



Kukkunersiuinermut Ataatsimiititaliap tusagassiorfinnut nalunaarutaa

22. januar 2021

Inuussutissarsiutigalugu aalisarnermi pisassiissutinik akuersissutinillu aqutsiviginninneq pillugu ingerlatsinikkut annertusisamik kukkunersiuineq

Nunatta Karsiata naatsorsuutaanik il.il. kukkunersiuinermut atatillugu ingerlatsinerit pillugit ingerlaavarnerusumik annertusisamik misissuisoqartarnissaa Kukkunersiuinermut Ataatsimiititaliamit kissaatigineqarpoq.

Misissuineri matumani suliassa qarfiit arlallit Kukkunersiuinermut Ataatsimiititaliamit erseqqinnerusumik qulaajaavigineqarumasut akornanni siulleq pineqarpoq. Misissuinerit naammassineqarneri ilutigalugit tamanut saqqummiunneqarnissaat ataatsimiititaliamit anguniarneqarpoq. Nalunaarusiilli Covid-19-ip nassatarisaanik kinguaattuungaatsiaqqapput. Taamaalilluni nalunaarusiap immikkoortua siulleq august 2020-mi naammassineqarpoq ullorlu 16.9.2020-mi ataatsimiititaliamut tunniunneqarluni immikkoortuatalu aappaa ulloq 29.10.2020-mi ataatsimiititaliamut tunniunneqarluni.

Nalunaarusiat ingerlaqqiffissiami uani nassaarineqarsinnaapput; ([link](#))

Nalunaarusiat imarisaat

Nalunaarusiap immikkoortuani siullermi Aalisarnermut, Piniarnermut Nunalerinermullu Naalackersuisoqarfimmi aalisakkanik pisassiissutinik akuersissutinillu aqutsiviginninnermi ingerlatseriaatsit sisamat qulaajaavigineqarput. Ingerlatseriaatsinut ataasiakkaanut tunngatillugu Naalackersuisoqarfiup aqutsiviginninneranik nalilersuisoqartarpoq aqutsiviginninnerullu nukittorsarneqarnissaanut siunnersuuteqartoqarluni.

Nalunaarusiap immikkoortuata aappaa avataasiorluni sinerissamullu qanittumi aalisarnermi akuersissutinik qinnuteqaatinik qiniataakkanik misissuiffiginninnermik imaqarpoq. Naalackersuisoqarfiup qinnuteqaatinik sularinnittarnera kukkunersiuineri piumasaqaataasut arlallit tunngavigalugit nalilersuiffigineqarpoq.

Nalunaarusiap immikkoortui taakku marluk nalunaarutiginninnertut ataatsit isigineqassapput. Nalunaarusiat kiisalu taakku pillugit Naalackersuisoqarfimmit oqaaseqaatit Nunatta Karsiata Kukkunersuisuanit ataatsimiititaliamut tunniunneqarput.

Tamatuma kingorna Kukkunersiuinermut ataatsimiititaliaq Aalisarnermut, Piniarnermut Nunalerinermullu Naalackersuisumut itisiliiviusumik apeqquteqarpoq. Naalackersuisup akissutai misissuineri immikkut ilanngussatut ilanngunneqarsimapput.

Ataatsimiititaliamit tupaallannartutut sakkortuumillu isornartorsiugassatut isigineqarpoq Aalisarnermut, Piniarnermut Nunalerinermullu Naalackersuisoqarfimmi:

- 1) Aalisarnermut inatsisit naapertorlugit aalajangersakkat arlallit malinneqarsimannngimmata tassunga ilaallutik nalunaarutit tunngavilersuutai.
- 2) Itigartitsissutigineqartut allallu allakkatigut tunngavilersorneqartussaataitanerat pillugu pisortat suliaminnik ingerlatseriaasiat pillugu inatsit malinneqarsimannngimmat

Misissuinermit misissugassatut tigusat akuersissutinut 2019-imi atuuttunut imaluunnit kingusinnerusumut ukioq 2020-mut akuersissutinut qinnuteqaatinik suliarinninnermut tunngassuteqarput.

Ataatsimiititaliap misissuineq pillugu naliliinera ataani takuneqarsinnaavoq.

Ataatsimiititaliaq sinnerlugu



Erik Jensen

*Kukkunersiuinermit Ataatsimiititaliami Siulittaasoq
Paasisaqarnerujumalluni ataatsimiititaliap siulittaasua oqarasuaammut ugguuna
attavigineqarsinnaavoq; (+299) 53 04 08*

Ilannqussaq: ([link](#))

Kukkunersiuinermit Ataatsimiititaliap oqaaseqaatai:

Pissutsit malittuani taaneqartut ataatsimiititaliamit sakkortunerpaamik isorineqarput

- Nalunaarusiami issuagaq siulleq: "Suliani misissukkani arlalinni avataasiorluni aamma sinerissap qanittuani aalisarnermut tunngasut pillugit naliliisoqarpoq, qanoq ingerlatsisoqarnissaanik (ingerlatsinermit tunngavissaq) aalajangiisimanerup aamma sullissinerpiamik ingerlatsinerup akornanni assigiinngissuteqartoq. Assersuutigalugu naalackersuisoqarfimmit tamatigoruinnaq nakkutilliiffigineqarneq ajorpoq, qinnuteqartut (taakkununnga ilanngullugit ingerlatseqatigiiffiit) akileraartussaataitanermit- aamma najugaqartussaataitanermit piumasaqaatinik naammassinninnerat, aalisarnermit inatsimmi § 6 naapertorlugu."
- Ingerlatseqatigiiffinnit quliusunit taamaallaat arfinillit angerlarsimaffeqarnermit kiisalu uuttuutit pillugit uppersaatinik nassitsisimanerannut Aalisarnermut, Piniarnermut Nunalerinermullu Naalackersuisoqarfiup qisuariaateqarsimannginera. Nalunaarusiami issuakkat aappaat: "Isumaqqarpoq, naalackersuisoqarfiup tunngaviatigut nakkutilliiffigisinnaanngikkaa ingerlatseqatigiiffiit uuttuinermit allakkianik inuiaassusermullu uppersaatinik nassiusisimanngitsut, ilumut angallatinik suli piginnittuunersut, angallatit Kalaallit Nunaanni angerlarsimaffeqarnermut aamma angallatit takissutsimut piginnaassutsimullu piumasaqaatinik naammassinnissinnaanersut."

- Sinerissamut qanittumi aalisarsinnaanermut akuersissutinik qinnuteqartut qinnuteqaataasa akornanni misiligutitut tigusani sisamani allaffissornikkut kukkunerit amigaaatillu arlallit paasineqarmata.

Deloitte ataani allassimaneratut allappoq. Nalunaarusiamit issuakkat pingajuat:

”Iltersuutit piusut tamakkiisumik allaaserinninnermik imaqanngillat, sullissisut suliamik ingerlatsinerminni qanoq qinnuteqaatinik suliaqassanersut aamma qinnuteqartut malittarisassanik piusunik naammassinninnerannut qanoq naliliisassaneranun tunngasunik.

Naalackersuisoqarfimmi sullissinermik ingerlatsinermi allattuineramik annikitsumik ingerlatsineq, sullissisut ataasiakkaat malittarisassanik aamma sullissinermik ingerlatsinissamut namminneq paasinnittaatsiminnik atuinissaannut annermik periarfissiuussivoq. Tamassuma nassataanik sullissinermut atasumik assigiinngitsunik aalajangiisoqarsinnaaneranun periarfissaqarpoq.”

Siuliani allassimasut ataatsimiititaliamit isornartinneqarput.

Deloitte misissuina ilaatigut ’Aalisarsinnaanermut akuersissutit pisassiissutillu pillugit Namminersorlutik Oqartussat nalunaarutaannik nr. 8, 8. april 2016-imeersumik’ tunngaveqarpoq. Misissuinerup naammassinerata kingornatigut ‘Aalisarsinnaanermut akuersissutit pisassiissutillu pillugit Namminersorlutik Oqartussat nalunaarutaat nr. 47, 18. december 2020-meersoq’ nutaaq atuutsinneqalerpoq

Nalunaarusiami issuakkat sisamaat: ”Taamaattoq naalackersuisoqarfik periarfissaqarsimannngilaq itigartitsinermut [pissutaasoq] pillugu allakkatigut uppersaammik nassiussinissaminut, sulianut allattuineramik sullissinermulluunniit tunngasumik allattuineramik uppersaasiortoqarsimannngimmat. Taamaaliornikkut naalackersuisoqarfik uppersaammik allakkamik saqqummiussisinnaannngilaq ingerlatseqatigiiffiup qinnuteqaataata itigartinneqarneranut tunngavilersuummik imaqartumik”.

Pisortat ingerlatsineranni sulianik suliarinnittarnermut inatsit malillugu allakkatigut qinnuteqaammik allakkatigut itigartitsinerup tunngavilersorneqartussaanaera piunasaqaataavoq.

Qulaani allassimasut ataatsimiititaliamit assorsuaq isornartutut isumaqarfigineqarput

Nalunaarusiami issuakkat tallimaat: ” Naalackersuisoqarfimmi maannamut periuserineqartoq tassaavoq, allakatigut akissummik naatsumik nassiussisoqartarluni, tassani qinnuteqartoq ilisimatinneqartarpoq pineqartoq akuersissummik imaluunniit itigartitsissummik tunineqarsimanersoq akuersissutinut nalunaarummi § 13 naapertorlugu (Aalisarsinnaanermut akuersissutit pisassiissutillu pillugit Namminersorlutik Oqartussat nalunaarutaat nr. 8 af 8. April 2016-imeersoq).

Tamanna isumaqarpoq, qinnuteqartut akuersissummik imaluunniit itigartitsissummik tunineqarpat pissutaasoq ilisimatitsissutigineqarneq ajortoq. Qinnuteqartut qinnuteqaataat itigartitsissutigineqarsimasut nalusarpaat itigartitsineq piginnaassutsimut killiussamik ataatsimik arlalinnilluunniit naammassinninnginnertik pissutigalugu itigartinneqarnerlutik. Itigartitsinnermut pissutaasup ersarissuunnginnerata kinguneranik qinnuteqartut itigartinneqarsimasut piffissami kingusinnerusumi akuersissummik qinnuteqarnissaminut pitsaanngitsumik aallaaveqartinneqalersarput.”

Pisortat ingerlatsineranni sulianik suliarinnittarnermut inatsit malillugu allakkatigut qinnuteqaammik allakkatigut itigartitsinerup tunngavilersorneqartussaanaera piumasqaataavoq.

Qulaani allassimasut ataatsimiititaliamit assorsuaq isornartutut isumaqarfigineqarput.

Naalackersuisoqarfimmit allakkiami 16.10.2020-meersumi ima allassimasoqarnera; “tunngavilersukkamik akissuteqartarneq atuutilersimasoq” ataatsimiititaliamit naammagisimaarlugu maluginiarneqarpoq.

Aalisarnermut, Piniarnermut nunalerinermullu Naalackersuisoqarfimmit allakkiami 16.10.2020-meersumi Naalackersuisoqarfik oqaaseqaammunik kiisalu ingerlatsineq pillugu annertusisamik kukkunersiuinermut kaammattuutitik atuutilersitsinissamut piffissaliilluni saqqummiussivoq.

Deloittemit kaammattuutit ilaat siumut aqqutissiuussinissamik pitsanngorsaatitullu siunnersuuteqarnissamik siunertaqarput.

Taamaalilluni ingerlatsineq pillugu misissuineq kiisalu siumut isigisumik pitsanngorsaatitik siunnersuuteqarnissaq matumani pineqarpoq.

Ataatsimiititaliap suliarinninnermini inuttarai:

Inatsisartunut ilaasortaq Erik Jensen, Siulittaasoq


Inatsisartunut ilaasortaq Aqqaluaq B. Egede, Siulittaasup tullia

Inatsisartunut ilaasortaq Malene Vahl Rasmussen

Inatsisartunut ilaasortaq Pele Broberg

Inatsisartunut ilaasortaq Aleqa Hammond

Ataatsimiititaliaq sinnerlugu



Erik Jensen

Kukkunersiuinermut Ataatsimiititaliami Siulittaasoq.